

北京圖書館 編

北京圖書館藏珍本
年譜叢刊

第 105 冊

北京圖書館出版社

□ 北京圖書館 編

北京圖書館藏珍本
年譜叢刊

北京圖書館出版社

第 105 冊



(清)蔣士銓編，蔣立仁補編 清刻本

清容居士行年錄

第一〇五冊目錄

清容居士行年錄	一
王文端公年譜	三五
述庵先生年譜	八三
程易疇先生年譜	二二九
甌北先生年譜	二九七
誥封昭武大夫色敏年譜	四二九
胥園府君年譜略	四三五
錢辛楣先生年譜	四五五
茂園自撰年譜	五四九

清容居士行年錄

余家先世姓錢氏浙江湖州府長興縣人居九里瀧翫
溪頭先祖靜之公諱承榮家素封年九歲值明季土賊作
亂家人倉卒驚避匿公巨匱中時

國朝定鼎遣將平吳越固山某公至錢氏宅發匱得公奇
公狀貌挾之去過玉山厯廣信府達鉛山縣時蔣公聖寵
爲邑長者與固山訂交相友善年踰四十無子固山遂以
靜之公爲其嗣于是始爲蔣氏子旣而聖寵公生叔祖恭
伯公家亦多故靜之公乃廢學祝太安人年十五來歸於
公首舉一女後適南昌萬氏旣而生三男子長漢先公諱
墓次玉符公諱墓次我府君非磷公諱堅以聖寵公命自
鉛山移居南昌靜之公性孤介不屑屑治生產年三十偕

二三作達之友徧遊名山大川歷五嶽者再漢先玉符兩
公各經營四方而祝太安人攜先府君灌園負販以自給
期功強近之親無有過問者既而靜之公倦遊歸與祝太
安人日長齋禮佛不理世事姻亞來慰藉者未嘗不哀其
志焉久之漢先公娶汪孺人無所出玉符公娶周孺人生
吾從兄士鏞及姊珍姑先府君年既冠猶苦志力學以夜
繼日倦則引爪交刺指甲間嘔血數斗應郡縣試輒前列
而卒困於學使者二十有六歲乃發憤遊京師轉徙燕晉
間幾二十年所爲義烈難能之事別見行狀比歸而祝太
安人已下世府君寢枕苦出三載服除始議婚蓋行年四
十有六矣南昌鍾滋生先生諱志順僑居餘干縣之瑞洪
鎮素稱長者生男子四人女子五人吾母太安人其季也

爲滋生公所奇愛擇壻至十八齡無當公意者公族子明經恭繩公舉府君行誼以告滋生公亦奇我府君遂以吾母許字是年爲雍正甲辰冬十月母來歸於府君婚期甫三日府君偕吾母扶祝太安人櫬歸葬鉛山九都之裏高塢而以二伯母周孺人附焉明年乙巳府君貧益甚五月兩伯父主令析爨吾父母居旁舍家四壁立一奴子宋阿洪相從灑掃炊汲而已是年十月士銓生

雍正三年乙巳

十月二十八日卯時予生於江西省垣東街小金臺前舊宅前一日寒旭晴霽夜半風雨如注及卯而震者三於是府君字兒曰雷鳴外祖妣李太孺人時來視吾母母既產而病顧復保抱之恩惟李太孺人恃焉時家貧甚小除之

日室如懸磬母按蓋篋得青蚨七文遣奴子市魯酒半升
鹽豉一區抱兒煨槽枌以守歲

四年丙午一歲

山西澤州守佟公國瓏時已致仕歸于旗府君友也至是
遣公子來江右索逋於某因偕府君爲粵東之遊旣而復
歸南昌

十一月吾母暨舅父遽廬公攜士銓歸寧于瑞洪爲滋生
公介七十壽十二月返南昌

五年丁未三歲

二月府君爲廬陵之遊遽廬公偕吾母挈士銓率阿洪之
瑞洪五月府君由廬陵抵瑞洪三宿遂北征蓋聞佟公以
屬吏虧空逮繫澤州獄故往營救焉事見行狀至是而士

銓從吾母寄養于外家者六年

六年戊申

四歲

士銓病癘月凡數發每發則驚搐死去母擊之晝夜繞室行既而痘發遍身尤危險外兄克輔日走數十里外求醫藥得不死既醫吾母乃教之識字苦兒穉不能執筆因縷竹爲絲詰曲波磔象形取勢攢簇成字以訓之識則散解之令兒復簇成不訛乃已

七年己酉

五歲

伯舅致光公教作字日授四子書四五行母爲加訓詰焉是年大饑滋生公家人暨吾母皆嚙糠粃哽不能下滋生公日以二錢購一溢米以二錢易市脯一片飼士銓歷二載如一日

是歲清江楊方來先生

錫綬

以部曹歸省舟經瑞洪訪族

兄簡臣時簡臣餽滋生公前庶賣藥士銓出揖之先生叩以所讀詩書皆成乃解雜佩以贈嗟乎高軒偶過詎知更二十五年乃以中書舍人出公門下耶

八年庚戌

六歲

瑞洪復饑士銓癩病亦時作歲凡六七焉

九年辛亥

七歲

母督課較嚴當士銓病作時母以唐詩粘四壁擎兒繞行教之誦詩以紓疾苦既愈或怠於諷詠母則背燈泣至夜分不止士銓叩以故母曰兒爲父晚年所生父又遠遊苟廢學父歸將尤我言次哽咽不能成聲士銓聆之亦不勝悲楚是歲夏初母病煩劇甫愈而李太孺人病危甚母力

疾強起左右扶持晝夜不少離厯六十餘夕未嘗偃臥六月李太孺人下世母哭而絕者再太孺人屬續之際執士銓手撫摩汨熒熒在睫閒於戲何日忘之

十年壬子

八歲

歲既寒矣士銓身著一短褐不能蔽膝母晝夜績麻縷易一布爲兒衣十二月父由蒲州歸里來瑞洪既哭李太孺人復勉承滋生公歡與兩舅氏相勞苦畱十餘日乃攜吾母及士銓率奴子阿洪歸於南昌舊宅

十一年癸丑

九歲

父與士銓皆病瘍足拳局十指僵腫不能飲食者幾周歲賴母左右遞飼之是年爲阿洪娶婦

十二年甲寅

十歲

六月妹潤姑生

十三年乙卯 十一歲

先是府君再遊澤州救佟公出獄義聲溢三晉王子去蒲州復經濩澤澤之王氏以富聞海內慕義好賢若弗及者時少司農鈞官京師以家事屬仲弟鏗所謂筠齋公是也筠齋與府君爲兄弟交恆約府君挈家北征三載中數以書來敦促府君于是攜眷屬遊於澤九叔父皇極公以家從焉

乾隆元年丙辰 十二歲

五月皇極公攜家南還士銓以無師故幾廢學吾母課督歷三載乃得卒六籍三傳之書秋外兄克輔來澤知滋生公以去年十月下世

二年丁巳 十三歲

四月誕吾弟七日而殤母病甚幾不起

三年戊午 十四歲

正月潤妹以痘殤

四年己未 十五歲

八月吾妹慧媛生士銓時受業於王允升先生庸同硯席者爲筠齋女兄之子朱五郎開基後登甲戌科武進士改

名崙時方總角耳

五年庚申 十六歲

士銓始學吟詠舅父蘧廬公來澤遂請業焉

六年辛酉 十七歲

蘧廬公南還應鄉試士銓病劇幾成瘵醫藥雜投無或效

秋八月予喘嗽不能臥一夕兀坐繩牀皎月穿戶牖嗒然而思若有所悟者力疾起燃殘燭出簾中淫靡綺麗之書數十冊并所著豔詩四百餘首火於庭向天泥首悔過誓絕妄念詰朝購朱子語錄觀之立日程自課至仲冬而神氣復強如初

七年壬戌 十八歲

王氏藏書數萬卷士銓於是涉獵者歷二載然苦鈍根不能悉記貪多泛鶩于提要鉤元之功蓋瞢然焉是年始讀少陵昌黎太白東坡各家集而於太白追歡宴遊流連神仙諸什輒厭其空且複云

八年癸亥 十九歲

九年甲子 二十歲

先是筠齋公入都補民部員外郎府君與偕至是已三載
府君既倦遊吾母亦思歸孔亟于燕返澤九月
以家南下十一月至瑞洪

十年乙丑二十一歲

二月還南昌舊宅與漢先公共居爲士銓聘張氏時年
十九四月卜居鄱陽月波門內典小食巷史氏宅栖焉時
府君春秋六十有八矣苦省會多人事之擾故浮家爲習
靜計十月復入南昌十一月爲士銓娶婦閱月而還

十一年丙寅二十二歲

正月府君攜士銓歸鉛山讀書就北門內馬街張氏塾經
師爲新建李先生先生甲子舉人端正誠謹執經者十
有七人堂戶列居皆滿予至止一小樓府君以日給委再

從兄士鑑凡錢三百文斷爲三十塊俾日予一塊爲蔬豉
膏火之用二月邑宰鄭東里先生之僑來塾中予邂逅揖
之退公叩李先生知予姓名呼以出問答移笑語李先
生曰此又一玉堂人物蓋邑中張素村先生紹渠方館選
爲公所拔士故云明日鄭公遣吏來邀入署齋語曰鵝湖
書院主席將至爾當附名請業於是得遊奉新張先生星
景之門四月鄭先生命投牒補試試畢名附邑童子冊尾
郡試亦補焉時督學金檜門先生按郡矣應古學試甫畢
復應正試榜出土銓名在第一覆試日金先生呼士銓名
詢家世遊跡竝古文詞所師承掀髯色喜顧諸廣文曰此
生他日成就不在我下乃取士銓而示於衆丹黃爛
然評曰喧啾百鳥羣見此孤鳳皇將來未可量也翼日古

學榜出郡凡取三人士銓名復第一金先生瀕行囑曰汝速返鉛山東書來南昌當有所語於是如命赴省投謁金先生曰無他語恐庸師誤汝汝來從吾遊可耳自是從學歲餘船窗署齋一燈侍側凡脩已待人之道詩古文詞所以及千古孳孳誨迪未嘗少倦士銓亦破除俗見朝程夕課不敢自棄於恩門也是年隨使車歷撫州建昌吉安贛州南安瑞州凡六郡歲暮始放假歸饒州省視老親焉其年冬受知於方伯彭青原先生每相見則呼曰蔣秀才

十二年丁卯二十三歲

二月自鄱陽赴廣信應科試三月金先生按郡士銓名列第二古學仍以士銓冠其列乃食餼從兄士鏞補府學弟子員試竣命士銓仍隨使槎卒其業于是更歷南康九江